



Australian Government

# Revizija multikulturalnog okvira

## Predstavljamo Reviziju multikulturalnog okvira

Australijska vlada sa zadovoljstvom objavljuje izvještaj o [Reviziji multikulturalnog okvira](#).

Revizija ispituje stanje australijskog multikulturalnog društva i preporučuje promjene zakona, politika i institucionalnih postavki koje se nadovezuju na njegove prednosti i omogućavaju mu da odgovori na savremene izazove.

Reviziju su provela tri eminentna Australca – dr Bulent Hass Dellal AO, gđa Nyadol Nyuon OAM i gđa Christine Castley. Odbor za reviziju je podržan od strane informisane i relevantne referentne grupe: g. Osmond Chiu; gđa Swati Dave; gđa Rana Ebrahimi; g. Bachar Houli; g. John Kamara; gđa Premila Levaci i g. Mohammad Al-Khafaji.

Vlada je objavila informacije o Reviziji i poziv za podnošenje podnesaka: tekstovnih na 33 jezika i u audio formatu na 35 jezika. Odbor je primio 796 podnesaka, 126 na drugim jezicima osim engleskog, koji su zatim prevedeni kako bi se razmotrilo njihovo mišljenje.

Vlada je, takođe, pozvala mlade uzrasta od 4 do 24 godine da u slikama izraze svoja iskustva i poglede na naše multikulturalno društvo. Njihova 103 umjetnička rada možete pogledati na [www.homeaffairs.gov.au/onlineartexhibition](http://www.homeaffairs.gov.au/onlineartexhibition).

## Održavanje naše uspješne multikulturalne priče

Najmanje 65.000 godina, Aboridžini i ostrvljani Toresovog tjesnaca su održavali mnoge kulture na ovom kontinentu. Oni su se oduprli sistemskim i ponekad nasilnim pokušajima da ih se iskorijeni u vrijeme kolonizacije. Uspješan multikulturalizam počinje boljim razumijevanjem i slavljenjem istorije i kultura Prvih nacija.

Dok je migracija na australijski kontinent započela 1788. godine, od 1945. godine, Australija je prihvatila 7,5 miliona migranata, uključujući više od 950.000 izbjeglica i osoba sa humanitarnim potrebama. Ove duboke, ali mirne promjene izvor su nacionalne snage i ponosa.

## Ključni zaključci revizije

Odbor je putovao širom Australije kako bi konsultovao više od 1430 pojedinaca i 750 organizacija. Među mnogim uvidima, Odbor je ustanovio sljedeće:

- Iako je vlada ta koja mora uspostaviti zakone i politiku za sprečavanje diskriminacije, promovisanje jednakih mogućnosti i omogućavanje pristupa jakim javnim službama, to svi oni koji Australiju smatraju svojim domom snose odgovornost za održavanje našeg multikulturalnog društva.
- Regionalne zajednice su kulturno sve raznovrsnije i važan su dio multikulturalne priče.
- Mnogi faktori oblikuju različite životne aspekte Australaca. Vlada mora razmotriti različite oblike diskriminacije pri donošenju interne politike.
- Mladi ljudi, koji će definisati multikulturalnu budućnost Australije, moraju biti u središtu razmatranja i kreiranja interne politike.

Dvadeset i devet (29) preporuka Odbora proizilazi iz tri osnovna principa Revizije:

- **Povezanost** – postavljanje temelja multikulturalne Australije putem rukovodstva, planiranja i odgovornosti na svim nivoima vlasti i zajednica.
- **Identitet i pripadnost** – stvaranje gostoljubive Australije kroz programe engleskog jezika, politiku dodjele državljanstva i učešće u umjetnosti, kulturi, sportu i medijima.
- **Uključivost** – izgradnja kulturnih sposobnosti u javnim službama, prilagođavanje programa bespovratnih sredstava, osiguranje digitalne uključenosti i snažnog sektora jezičkih usluga, te zadovoljavanje jedinstvenih potreba mladih i regionalnih područja.

Ovo je jedna od najznačajnijih i najpažljivije sastavljenih revizija australijskog multikulturalizma koje su do sada provedene. Vlada se obavezuje i rukovodiće se načelima Okvira, u nadograđivanju naše predanosti osiguranju da australijsko multikulturalno okruženje koristi talente svih Australaca.